



Fasnacht 2008

Sujet: **20 Joor und immer no sprützig**

Es het in Prattele es paar Chaote
die mache nüt wo isch verbote
über die tüen mir jetzt brichte
und ehrlich sind alles wohri Gschichte
will sit 20 Joor isch das nit cool
gits die Wageclique ganz wonderful.

Drum chunnts uns vor, als isch es geschter gsi
wo mir bschlosse händ an de Fasnacht simmer drbi
so hämer uns denn au gründet
und das am Umzug de Prattler verkündet,
mit unserem Wage e wahri Pracht
ganz eifach mit ufghängte Lientüecher gmacht
zu me hets leider nit glängt, ganz im Vertraue
klar wenn me erscht 2 Wuche vor de Fasnacht afoht mit Wagebaue.

So hämer unseri Lehre druss zoge für die kommende Joor
unseri Wäge sind immer besser worde, es isch nit blöfft aber wohr
s` het immer besser klappt mit Idee kreiere
und au am Umzug isch's immer besser gange mit integriere.

Denn isch es Joor cho es macht uns Alte ä bitzeli weh,
hesch am Umzug numme no 4 Rueche ufem Wage gseh
doch s'Joor druf, dass z'säge tüen mir uns fascht nit getraue
die erschi Fasnacht zämme mit Fraue
aber irgendwenn das cha me nit abstritte
het's uf jedem Wage mindeschdens 1 Gritte.
aber mir wänd de Wandel nit verflueche
sicher wäge dem gits jetzt au 20 Joor Dorfplatzrueche
und sit zwei Joor, s'isch so genial
sind's sogar 5 Fraue an der Zahl.

So wäre mir also scho in dr Gegewart
bi uns macht Männli und Wybli Fasnacht, knallhart
mir händ also e gschächtlichi Chrüzig
drumm das Sujet: **20 Joor und immer no sprützig**
jetzt danksch sicher: Händ die Dorfplatzrueche Fantasie
wie cha e Frau denn sprützig si?
das Sprützig bezieht sich: Isch es uns nit glunge ?
dank logischerwies uf dr Dorfplatzbrunne
will dä hämer, isch eifach zum verstoh
au druf uf unserem Clique logo
und hocksch jetzt dehei und tuet di öpis irritiere
tuesch nomol am Umzug umestudiere
bisch dr Meinig es isch dr Dorfbrunne an dir verbi
jo genau das wäre mir Dorfplatzrueche gsi

Au sunscht passt das Sprützig no guet zu eus
all Joor es tolls Sujet und immer es neus
au de Wage tuet nie glich usgseh
dr Ufwand tüen mir gärn uf uns neh
sogar vor 2 Joor wo dr Wage isch zämmekracht
hämer no schnell am Sunntigmorge e neue gmacht
jede Anderi hätti gseit: „Jetzt isch's verbi“
numme mir händ gfunde:“ Mir sind glich drbi“
ebbe, wie scho gseit und gschrivebe
mir si in all dene 20 Joor sprützig blibe.

Apropos sprützig, do fallt uns no i
sprützig cha au es Getränk si
egal ob süess, bitter oder suur
ob vomene Uswärtige oder Prattler Buur
Hauptsach isch ohni bschisse
es isch en gsprützte Wysse.

Zum sprützig si hämer no e heikli Sach
mir behandle das Thema numme ganz schwach
will wenn sprützig bisch, dass weiss Gross und Chli
denn bisch potenziell voll drbi

No e Tip: Wenn sprützig bisch, denn bisch „In“
drum sind mir au im Internet drin,
eifach www.dorfplatzrueche-prattele.ch aklicke
scho bisch uf dr Homepage vo unserer Clique
jetzt chömmme mir langsam aber sicher zum Änd
mir händ gschrivebe was mir wänd
mir freue uns scho, dass isch kei Scherz
uf d` Fasnacht 2009 am 1.März
jetzt möchte mir no unseri Geburtstagstorte versueche
also „Tschau Zämme“ euri Dorfplatzrueche